

四庫全書

史部

欽定四庫全書

史部

歷代名臣奏議卷五

欽定四庫全書

史部

歷代名臣奏議卷五

詳校官檢討臣朱依昊

編修臣裴謙覆勘

總校官編修臣王燕緝

校對官中書臣李荃

謄錄監生臣鮑汀

欽定四庫全書

歷代名臣奏議卷五

明 楊士奇等 撰

君德

宋理宗寶慶元年禮部侍郎真德秀上奏曰臣竊聞陛下
迺者消選剛辰移御清燕非特恬養神明之觀抑且稍正
宮寢之儀臣子之心不勝慰幸然區區之愚有欲獻於陛下
者不敢自嘿恭惟高宗皇帝受命中興再造區夏六飛

南渡駐蹕錢塘其與前世之君筚路籃縷以啟山林披攘荆
棘以立朝廷者殆無以異其艱其勤可謂至矣孝宗皇帝嗣
守丕緒志清中原二十八年之間蒐攬賢材厲精聰斷未嘗
一日少懈用能保固大業垂萬世無疆之休令陛下所御之
宮庭即二祖儲神閒燕之地也仰瞻楹桷俯視軒墀當若二
祖實臨其上念昔者崩守之惟艱思今日繼承之匪易則兢
業祗懼其容少忽乎漢文帝有言朕奉先帝宮室常恐羞之
惟其以是存心故能終身為恭儉之主兩漢之賢君莫先焉此

臣之所欲獻者一陛下前所居處密邇東朝唯思曲盡人子之恭其敢遽當人主之奉今宮闈暨乘輿服用之需頤指使令之便必將浸備於昔臣知聖性恬淡固非外物可移然以一心而受衆攻非卓然剛明弗惑未有不浸淫而蠹蝕者然則將何道以處之曰惟學可以養此心惟敬可以存此心惟親近君子可以維持此心蓋理義之與物欲相為消長者也篤志于學則日與聖賢為徒而有自得之樂持身以敬則凜如神明在上而無

非僻之侵親賢人君子之時多則規倣日聞謗邪不得而惑三者交致其力則聖心湛然如日之明如水之清理義常為之主而物欲不能奪矣此臣之所欲獻者二年之喪行於宮壺非獨衰麻在躬而已哀慕之存於心者不可頃刻忘憂感之形於色者不可斯須已古者卒哭而廬居小祥而壘室今雖未能如昔然居處之制不可不極其樸素也古者服喪非有疾不飲酒食肉今雖未能如昔然饗人大官之供不可不極其菲儉也古

者終喪不處于內今雖未能如昔然防微謹獨屏遠聲
色不可不極其嚴也食則見先帝于羹立則見先帝于
壙庶幾不負罔極之恩不昭純孝之實儻因移御之適
凡所以自奉者少異於居喪之儀則雖衰麻在躬猶不
服也此臣之所欲獻者三陛下前者日侍慈明兩宮之
情常歡然而無間今視膳問安之敬雖無改於昔而其
見則有時矣此正陛下深留聖心之日也古之事親者
聽於無聲視於無形一舉足一出言不敢忘父母也況

皇太后親舉神器以授陛下同聽萬幾曾未數月褰裳去之如脫敝屣隆恩厚德與天地無極陛下將何以報之乎然則恭勤之禮孝養之誠當有加於前日可也至於兩宮侍御之臣恩意當使如一蓋愛親者及其犬馬況左右使令者乎厥今羣臣萬民之命繫於兩宮慈孝交隆於上則羣臣萬民皆有所恃以為安而兩宮侍御之臣亦得以保其富貴此臣所欲獻者四臣猥以不材叨備勸讀比者親承聖訓苟可裨益朕躬母或有隱陛

下之虛懷求助如此臣其敢以淺陋自解乎用是輒陳
其愚冀補萬一惟聖明擇焉

紹定六年德秀為戶部尚書又奏曰臣聞當天命已定
之餘而不忘戒懼者三代令王之所以長世也當天命
未定之時而遽忘戒懼者後世人主之所以不克終也
臣嘗讀書而得基命定命之說竊以謂周之文武基命
者也若成王則命已定矣而周公作詩以戒王乃曰宜
監于殷駿命不易又曰命之不易無遏爾躬召公作書

以戒王亦曰王其德之用祈天永命又曰欲王以小民受天永命夫周至成王再世耳而文武之功配天罔極天命烏乎而遽止亦豈待祈而後永耶及觀太康之於夏太甲之於商僅一再傳而一則以盤游失國一則以欲敗度縱敗禮而幾失之天未嘗以禹湯之烈而私其子孫也是以謂之難諱是以謂之靡常然後知二公惓惓之忠非過計也然則繼體守成之主其可以天命已定而忽之哉厥今天下何時也臣以為天命未定之時

也夫自藝祖基肇造之命而太宗定之高宗基中興之
命而孝宗定之聖子神孫繼繼承承于千萬年命之定
也久矣而臣以為未定者蓋觀皇矣之詩而知文王受
命之由方天厭商亂而求民之定也始則觀之二國焉
求之不獲而又觀之四國焉其德皆莫若文王者於是
睠焉西顧命之為中夏主夫豈苟然哉今中原倣擾天
之簡求民主茲惟厥時使吾之德足以當天心天必不
舍而他畀也苟吾之德未足以當天心天必轉而他之

矣臣故曰此天命未定之時也嘉定中臣繆直禁林是時韃日以興金日以削嘗中夜彷徨而起曰此吾國安危將判之秋君臣上下恐懼修省之日也於是進祈天永命之戒寧宗皇帝優容狂瞽嘉歎再三而權臣寡識懵不之省自是二十餘年德政未嘗增修人心惟益盭怨所謂祈天永命之言直視以為迂闊而欺天罔人之事則益甚焉是以譴告頻仍灾害酷烈錢塘巨浸莽為沙磧天台苦雪州化為湖而都城之灾則尤曠古所未

有他如彗孛飛流之變無歲無之盜賊兵燼之厄幾乎
天下吾國之勢蓋岌岌然上賴九廟之靈權臣殞命陛
下親政英明果斷薄海聳觀而於外攘內修之政未及
大有所為金遽以滅告矣羣雄虎爭猛敵焱銳豫備深
防所當汲汲內顧根本猶有可虞而邊臣匆匆或假和
以紓患或恃戰以成功臣以為皆非至計也昔人有言
凡舉大事必順天心夏秋以來積陰多雨陽澤弗競而
乾文示異數見於清臺之占因人事以推天心殆有甚

可懼者臣是以復進祈天永命之說也然所謂祈者豈
世俗禱禳小數謠瀆鬼神之謂也稽諸召誥曰敬德曰
小民而已傳有之敬者德之聚能敬必有德近世大儒
皆謂敬者聖學之所以成始成終也陛下聖學高明固
嘗以毋不敬之言揭諸宥坐朝夕仰視如對神明然所
以害吾敬者則不可不薦也儀狄之酒伐德亂性此害
吾敬者也南威之色蕩心惑志此害吾敬者也陛下於
此心惕然自省曰沈湎冒色婦言是用昔人之所以自

絕也其可不戒乎侏儒之戲滑稽之談此害吾敬者也
陛下於此心肅然自持曰優笑在前賢才在後昔人所
以取亡也其可不戒乎鄭聲之淫佞人之殆有一于此
皆足害敬放而遠之不可以不嚴盤游之樂弋射之娛
禽獸之珍狗馬之玩有一于此皆足害敬屏而絕之不
可以不力如此則陛下之心清明純粹萬善出焉則又
反而思之曰朕自即位以來為權臣所誤其失有幾凡
聖心之所未安者即天理所未安也改之其可以或吝

則又稽于衆曰朕言動之不中道政令之不合宜者其事有幾凡人情之所未允者即天意所未允也更之其可以或後蓋一念之愧不敢安此敬也一事之戾不敢忽亦敬也謹之於心術之微而發之於踐履之實必如湯之日躋文王之緝熙中宗之嚴恭寅畏然後謂之無不敬此祈天永命之一也然召公既曰敬德又必以小民參之何邪盖天之視聽因民之視聽民心之向背即天心之向背也權臣用事以來戕賊元元殆非一事蓋

其始也易楮幣易鹽鈔額用閭利之術而峻繩下之刑
估沒編隸濫及無辜而民怨其中也黜忠良而進貪刻
舉赤子以付豺狼遠近嗷嗷恬不之恤而民益怨其末
也廉耻道絕貨賂公行以服食器用為未足而責之以
寶玉珠璣以寶玉珠璣為不足而責之以田宅契券希
指求進者雖殺人于貨亦所忍為而民大怨矣江湖閩
廣三衢之盜相挺而起生靈荼毒幾千萬人戶口減少
殆什七八幸而無盜者又以官吏爭自為盜田里荒寂

州縣蕭條亦無異於綠林黑山之所躡轍也可勝嘆哉
仰賴陛下布端平之詔一洗而新之然狃于舊習者鮮
為革心之圖困于虐政者未被息肩之惠蓋賄道雖窒
而昔之賄進者尚存賦吏雖懲而賦多者或反漏網加
以邊事既興江淮之間科調百出所至騷然民不堪命
遠而襄蜀抑又可知臣恐非所以培本根壽命脉也陛下
至仁寧忍聞此臣願聖志惻然興念申頒詔旨凡郡
邑培刻之政邊閭科調之擾悉從禁止敢違命者必罰

無赦至於行都近甸為沐浴雨露之首而楮輕物貴為
生孔囏愁嘆之聲在在而有書稱文王惠鮮鰥寡蓋窮
悴之人奄奄就盡惠澤所及鮮然咸有生意此海內所
望於仁聖之君也宜命近臣條舉便民之畫如魏相所
上詔書二十三事者以次行之此祈天永命之二也易
曰天之所助者順人之所助者信是以自天祐之吉無
不利陛下真能敬德於上而使斯民懷生於下則人心
悅而天意順恢拓之本其在斯乎天心將轉久矣韓戎

殘暴所至為墟必非眷命之所屬陛下春秋鼎盛聖德
日新惟益懋敬焉一陟一降在帝左右一游一衍若天
與俱強勉力行悠久不息以迓續休命於無窮乃睠南
顧當有其日中原故物終為吾有若徒以力求之而不
反其本天意難測臣實憂之昔梁武欲取河南嘗自語
曰吾之基業有如金甌脫致紛紜悔之何及徒以乙劖
之夢羣臣之諛不能自克卒隳金甌之業追迹梁武平
生所為違天悖理何可勝數無得天之寶而希不世之

功其失宜哉臣區區所陳本於周召聖賢典訓必不誤人且前日嘗以告先皇今敢不以告陛下臣之愚忠壯老一心惟聖明裁察

寶慶初魏了翁上奏曰臣不佞待罪史臣獲際陛下龍飛御極命侍從言語之臣以次面對切惟澄源正本罔不在初臣不敢掇拾細微具文應詔臣聞心者人之太極而人心又為天地之太極以主兩儀以命萬物不越諸此故天之神明春秋冬夏風雨霜露地載神氣為風

霆流形庶物露生其於人也則清明在躬氣志如神蓋
貫通上下表裏民物自繼善以及於成性皆一本而分
也而人心之靈則所以奠人極人極立而天地位焉孔
子曰事父孝故事天明事母孝故事地察子思曰君子
之道造端乎夫婦及其至也察乎天地夫天高地下人
位乎其中判然三才若不相接也而五行二氣自一而
分故上下同流彼動此應使行乎宮庭屋漏之間炯然
清明無少愧怍則仰觀俯察光潔昭著前參後倚流布

充塞無非此心之發見一有不慊則眎上帝而夢夢顧
四方而戩戩雖日星草木亦若隨人意而不舒者陛下
謂此心之外別有所謂天地神明者乎抑天地神明不
越乎此心也正月之朔風來自乾丁丑既望月蝕于翼
占者以為兵戈之應迫近之象而雷電先時而發雨雪
繼雷而降劉向亦以為陽不閉陰陰見間而勝陽之應
然而此必有感而後為應既應則復為感不可以其變
在外而忽之其事已應而幸焉側聞陛下嘗謂講讀之

臣夜來雪作朕終夜為之不安當益恐懼脩德大哉聖
言此正求端用力之要也且陛下居深宮之中十手十
目所不睹聞也而惕然終夜若有臨乎其前者以此見
天非蒼蒼之謂也陛下之心與億兆人之心義理所安
是之謂天不愧于人是不愧于天也不畏于人是不畏
于天也臣願陛下即此不安之心而益加推廣其見天
地也毋專以禱祠為事常使此心兢兢惕惕如與天陟
降如在帝左右可以對越而無愧奉宗廟也毋專以備

物為饗常使此心油油翼翼如見乎其位如聞乎其容
聲可以受終而無怍事太母也母專以儼恪為恭常使
此心洞洞屬屬如執玉奉盈如將弗勝可以感通而無
間對公卿百執事母徒以尊嚴為儀也常使此心寬虛
平夷盡下而無所伏對經生學士母徒以誦說為功也
常使此心緝熙光明日新而不可已播告于萬方有衆
母徒以言語為化也常使此心明白洞達觀感而無所
惑心有未喻必反覆問辯以求之母厭煩以自畫也心

有未可必熟復思念以圖之毋耻過以成非也夫如是
息養瞬存朝習暮益無頃刻之間則大本既立何事不
可為以證諸庶民以攷諸三王以建諸天地以質諸鬼
神以施諸後世何往而不可合也不然則庶民且弗信
而況其他乎聖學淺深之候氣數屈伸之感世途理亂
之變人物消長之幾根於此心決於此時惟陛下速圖
之

了翁權禮部尚書又奏曰臣嘗從師友講學每謂治國

之本始於正君嘗儲神蓄思將為陛下力陳修身齊家
之要既至近畿則所聞日異恐或者指臣為闇於事情
又不然謂臣為專攻上身故臣先為陛下據時事之迫
切者而言之然而本原之論則何可以終無一言也臣
每惟後世之治與古絕異古之人君以天位為至艱至
危如履虎尾如蹈春冰如恫瘝乃身是故師氏司朝僕
臣正位太史奉諱工師誦詩御聲幾聲巫史後先卜筮
左右人主無一時可縱弛也虞賓在位三恪助祭夏士

在庭殷士在廟儻民在甸夷隸在門人主無一事不戒懼也蟲飛而會盈日出而視朝朝退而路寢聽政日中而考政夕而糾虔天刑日入而潔奉粢盛然後即安人主無一刻可暇逸也后妃御見有度應門擊柝鼓人上堂女史授環彤管記過人主無一息可肆欲也夫以貴爲天子富有四海之內而自朝至是兢兢業業居內之日常少居外之時常多蓋所以養壽命之源保身以保民也豈惟可以保民雖子孫千億亦自此始自秦人蕩

滅古制為人上者深居穆清而授事於婦寺出令於房
闈四方文書非贊御之臣不得上聞千數百年以來相
尋一轍於是宦官外戚女寵嬖倖代操政柄人主僅擁
虛器以寄于民上其接士大夫不過視朝數刻之外凡
以傷生伐性者畢陳於前豈惟涇政事之原抑以傷壽
命之本身不得康嗣不得蕃凡以是耳陛下以聖智之
資而為權臣所操者十年幾無以自白於斯世今幸居
可為之時外而百官有司奔走效職內而妃嬪嬪御便

嬖取憐自淺中者視之必曰今乃知為皇帝之貴也今
天下太平宜及時為樂也而臣以古今禍亂之事觀之
則陛下雖曰勢重形佚其實巍然孤立於至艱至危之
地而不自覺也陛下試思夫獨居深宮之中可託之以
腹心者誰歟當此事變還來之時可以繫天下之望者
誰歟詩曰介人維藩大師維垣大邦維屏大宗維翰懷
德維寧宗子維城此六者守邦之要道也而其要則又
在於宗子宗子者傳謂王之適子也無適子以為之城

則王之獨居何恃而不畏乎故繼之曰無俾城壞而獨
斯畏陛下誠能長慮及此則今日孤立之勢亦可以自
覺矣傳曰后妃有正淑之行則嗣續有賢聖之君制度
有威儀之節則人君有壽考之福此言希御幸以嗇精
神則可以永壽命而蕃嗣續臣嘗記魏史明帝耽于內
寵廷尉高柔上疏以為嬪嬪過數聖嗣不昌宜妙選淑
媛以備內宮之數其餘盡遣還家且以育精養神專靜
為寶則螽斯之美可致如魏明者雖不足為聖時道而

柔之言實保身蕃嗣之要故臣願陛下念天命之不易
思王業之惟艱必也居內之時常少居外之日常多親
賢而遠色則思慮精明清心而寡欲則體力堅實無姦
聲亂色則血氣循軌無淫樂慝禮則精神內守豈惟保
壽命之道是乃致嗣續之原臣之所憂甚於漆室之女故
忘其愚僭者若此若夫韓琦言于仁祖所謂建學內中
擇宗室之謹厚好學者升入內學冀得親賢以屬大事
是說也亦宜早入聖慮博訪而豫定焉卷卷之忠退俟

斧鑽

端平中祕書少監袁甫上劄子曰臣仰惟陛下更化以來廣開獻言之路而羣臣交進互說大而朝廷之綱紀微而田里之纖悉遠而邊鄙之變故近而宮闈之奧密臣下言之可謂詳陛下聽之可謂熟矣而至於切陛下之身之心者間雖言及一二而未有懇懇惻惻竭盡忠愛不顧忌諱不避嫌疑為陛下盡言無隱者臣一介踈遠去國一紀茲叨誤渥幸覲清光敢不一吐其愚以報

陛下知遇哉臣嘗讀無逸一書蓋周公晚歲所作字字真實吐自肺肝非徒紙上空言而已觀其論商周享國之脩短明示兩途若曰由此則金玉厥躬而養壽命之原由彼則斲喪戕賊而失性命之正故凡受病之根伏於隱微而萌蘖易生者周公皆一一先其未病而藥之蓋適情肆欲是之謂逸故此書戒以後王惟耽樂之從亦罔或克壽懼其心志內荒而縱伐德之斧也勞民動衆是之謂逸故此書戒以無淫于觀于逸于遊于田懼

其窮極民力以騁耳目之娛也輕改舊章是之謂逸故
此書戒以變亂先王之政刑至于小大懼其驟更數易
而無堅凝之守也不恤衆怨是之謂逸故此書戒以民
否則厥心違怨否則厥口詛祝懼其怨懃繁興隄決而
川潰也淫刑窮兵是之謂逸故此書戒以亂罰無罪殺
無辜懼其輕視人命路熟而手滑也老臣忠愛先事預
防列此數條凜若金科苟犯其一害已可畏兼犯數者
危乎殆哉嗚呼周公受文王武王付屬之任恐恐然惟

懼成王不自愛重則於吾責為有負故其勤拳真切之意必欲始終保護成王全而歸我文武庶幾無慙於託孤云爾然則無逸一書固切於成王之身心尤萬世帝王之藥石也恭惟陛下勇智本乎天錫聰明冠乎羣倫猶且孜孜勉免崇儒興學其於帝王之道蓋已融合無間矣抑臣猶願以無逸為陛下告者蓋臣即此書以驗今日之事如印券符鑰之相契殆若端為陛下而發者不可不精思而深省也且陛下固知節情欲之流以保

天和持儆戒之念以彌德性矣天下咸以是賀陛下臣則未敢以爲慶也譬彼蔓草暫爾芟蕪春陽一轉茂然復生何則元有蔓草之根固與無宿根者不同也泛觀天壤之間嘉禾與蔓草同受一氣而不能兩立嘉禾茂則蔓草不殖蔓草榮則嘉禾必枯反此理以觀此身物欲之根不去則性命之基不牢性命之基欲牢則物欲之根當絕陰陽消長之理斷斷乎有不可誣者而况女德無極易以溺人剛制于酒克終實難尤陛下所宜兢

兢戒謹也陛下固知體恤民情而不至積怨讐之釁存
心仁厚而未嘗萌嗜殺之念矣天下咸以是賀陛下臣
亦未敢以為慶也數年以來江湖閩浙寇亂交作吾民
死於征歟死於徭戍死於兵革否則死於饑荒者何可
數計重以楮令日變物價日增民生無聊怨讐並起昨
者中原有可乘之會臣下獻規恢之策淮襄困於餽餌
百姓踣於道塗偏師輕動棄甲而復然則陛下雖不疲
民力以召怨而民力至今日而竭陛下雖無嗜殺人之

念而民命至今日而殘孟軻有言殺人以梃與刃有以
異乎無以異也以刃與政有以異乎無以異也陛下心
甚仁於百姓而百姓怨乃歸於陛下凡無辜而死者雖
非陛下殺之猶陛下殺之也無逸之終篇論哲王聞小
人之怨詈則皇自敬德大哉敬乎敬心常存必不溺於
情欲必不移於玩好必不勞民必不佳兵天下欣然戴
之為君而又何怨之有不然競業一或少懈邪僻乘間
而入侈心虐政捷出無端其極也民咨胥怨怨之不已

至于詈罵之不已至于詛詛騰於萬口怨萃於一人故周公痛切而言曰怨有同是叢于厥身此怨不歸於他人而身實當之然則人怨乃移為已怨禍人乃所以自禍也勢一至此雖欲長享天祿以綿無疆之休其可得乎且夫逸欲之極至於輕殺而原其根本則始於一念蓋一念喜功伏藏于中始若甚微炎炎不已易以滋熾及兵端一啟小不如意則遽斂而藏之夫斂之固是也然卧薪嘗膽果為何事敵國外患所以進德又豈容信

甘言而弛武備乎臣恐前日之輕舉與今日之宴安其
為逸一也抑臣又聞勤者逸之對也人皆知勤之為無
逸而不知徒勤亦逸也秦皇之程書隋文之傳餐乃叢
脞非無逸也正使日御經惟親近儒生若可以言勤矣
然耳聽經訓而身不行焉則雖勤亦逸耳是故專心致
志自彊不息是謂無逸聽之必行行之必力是謂無逸
出而與講讀相親是心也入而與妃嬪相處亦是心也
治朝聽政之時是心也燕朝便坐之時亦是心也無作

輶無暴寒是謂無逸斯道也在大易謂之生生活在魯論謂之仁壽斯須放逸則生理息一念間斷則仁壽虧甚可畏也甚可懼也周公所以保護成王至于壽考者正以元老大臣其責切已故耳陛下可不深念於此哉臣曩者將指江東因辛卯鬱攸之後嘗瀝忱悃力言逸欲之害時朝廷以言爲諱挹此孤忠無階得達今公道開明樂受忠言臣敢復以此說一悟聖聰惟陛下財幸甫又上直前劄子曰臣猥以庸虛疊膺誤渥擢司記注

直前奏事職也今事之當言者奚止一端陛下樂受盡
言不以犯顏為罪臣其敢苟為緘默以上負明天子知
遇哉臣近者密侍經惟因論聖人之剛德嘗啟奏陛下
剛之一字最切於陛下之身羣臣言剛德者多矣而實
未識所謂真剛也孔子曰吾未見剛者或以申張為對
子曰張也慾焉得剛夫剛與慾似非對也而孔子必對
言之者蓋有慾則我為物役無慾則我能役物我能役
物非真剛乎有慾則私意橫生無慾則與天為徒與天

為徒非真剛乎大易所謂剛健中正純粹精者此也
中庸所謂發強剛毅足以有執者此也有毫髮之私
喜私怒則鼠隙由此開有纖微之旁蹊曲徑則蟻
穴由此啟是故懲忿窒慾謂之真剛克己復禮謂之真
剛漢高祖唐太宗非無英明雄武之略然君子不敢以
真剛許之者正以其不知帝王宅心密察之功而害吾
之剛德者多也元帝牽制文義優游不斷而漢業以衰
文宗虛懷聽納不能堅決而唐室不振嗚呼惟辟作福

作威何所拘牽而無斷人主天下利勢何事遲回而不
決誠以為不斷耶可恭顯之奏而殺望之斥堪猛更生
者又何其斷歟不斷於去佞而反斷於去賢此漢之所
以衰也誠以為不決耶擯李德裕之黨黜李石於遠外
者又何其決歟不決於逐小人而反決於逐君子此唐
之所以不振也夫元帝文宗天資仁厚之主也親近儒
生之主也剛德不足卒至大弊而當時之臣又無以真
剛之說啟沃上心者二君自視吾之資稟決不足以望

高帝太宗則寧守吾之仁厚喜儒不至於失故步耳特不知人主宰制四海運動六合豈區區仁厚喜儒所可辨哉是必有真剛之德而後可也仰惟陛下聰明天錫問學日新真剛之德固已得之聖心矣夫蘊於中必發於外陛下果有真剛之德則政事施設之間必有不可掩者何為乎闇焉而未彰也陛下豈以發號出令率意輕變以是為剛乎此似剛而非真剛也且今日至大至急之務有二曰楮弊也邊事也陛下雖與弊焉日夜以

為憂而筭計見効迄無秋毫之功者臣以為皆由陛下
剛德之未充耳誠使剛德見於節浮費則凡官闈之用
度近臣之錫賚冗官冗吏之蠶食自今以始痛加裁抑
推此以行於州縣則所省之費皆可以助收楮之用矣
今乃以節用為老生之常談悠悠歲月苟且因循終不
忍大有所損以示吾刻苦警勵之意真剛固如是乎剛
德見於懲贓吏則取二三十年以來蠹國害民之人富
藏於私者盡歸之於公毀家纾國自古有之明白洞達

務在必行則皆可以佐收楮之用矣今乃僅因人言略
加發摘罪大罰輕輿論未快陛下方且回旋曲折依違
掩覆已發之賊既如是而未發者厚積深鑄偃然安享
陛下悉置之不問是前日縱其為國之賊而今日又教
之不體國也真剛固如是乎剛德見於核軍政則邊境
之事所合大加搜校某處新疆失守某處戍兵損折某
處招人填補兵糧元計若干減省若干新招贍給若干
盡吐事實毫髮無隱而不然者顯寘之罰今乃諱敗遂

非不以實聞生券利贏缺額不補陛下明知其欺罔未
嘗一加黜責真剛固如是乎剛德見於擇帥權則堂堂
中國豈無至公血誠沈幾多智之士足以當閫外之寄
今焉淮襄制垣不聞虛心無我收羅俊彥以資幕畫又
不聞深謀遠計保境安民以圖後効精神困於挫劙之
餘智勇竭於耗散之後至於分閫汾江者兩淮事勢不
相統屬下多矛盾之見上無調一之策平居尚有違異
緩急何以得力自古用人大必先儲代今未用者謂其局

生而非老手已試者雖云局熟而又罔功邊遽日聞敵情叵測卧薪嘗膽合智併力猶懼不足陛下乃宴安暇裕如平時真剛固如是乎陛下自更大化動以漢宣總核名實為比臣竊觀陛下徒有慕漢宣厲精為治之名而乃墮於元帝文宗柔弱不振之失是以擇善固執未有堅定之力聽言納諫未有果決之操剛德不競意愛少偏潛窺於杳冥之中旁睨於幾微之際希求御札浸開竊弄之門憑恃寵恩將有履霜之漸陛下勿謂吾之

聰明自足洞照而不必過慮也罅隙一開皆害剛之斧
損德之蠹也臣恐日積月累浸淫不已勸陛下以所當
為者則蓄縮而有待贊陛下以非所當為者則果斷而
必行何則主宰不定意向易移其弊必至此耳古語曰
不見其形願察其景今陛下剛德之未充是必有陰受
其病者而陛下特未之覺耳因景知形防微杜漸勿使
之彰著則善矣真剛在心不在力養剛以漸不以暴撫
劖疾視匹夫之勇一鼓作氣再則易衰夫惟奮以大勇

而又有積習涵養之功則剛德塞天地矣陛下有堯舜之資而甘與漢元帝唐文宗伍此臣所以憤懣不快而欲一吐其愚也狂僭妄言罪當萬死惟陛下財赦

甫為中書舍人又上內引劄子曰臣猥以疎庸誤蒙收召寵光狎至感深涕零自惟蒲柳弱質早衰多病游布忱悃竟闕俞音然而葵藿傾陽寸心炯炯儻終於辭避非陛下負臣而臣實負陛下矣是以勉策疲駑祇服明命幸借玉階方寸地輒撾管見少裨萬分願賜垂聽臣

仰惟陛下聰明天縱勇智天錫心源昭徹時幾洞見亦嘗深思而默省乎夫莫尊乎天矣其喜說其威怒陛下所以知之者非心歟莫幽乎鬼神矣其朕靈其怨恫陛下所以知之者非心歟莫嚴乎祖廟矣其安樂其憂悲陛下所以知之者非心歟方此心之未與物交也湛然清明寂然靜止及其既交於是喜怒哀樂生焉然而時值乎艱危事遭乎變故喜樂未見而哀怒先形繼天為子而天心未契也主祭百神而神心未格也受列聖之

付託而列聖之心未慰也則為之戚焉赧焉慄慄焉而
加以羽檄交馳邊塵暗矣士馬物故喪師聞矣孤人之
子寡人之婦哭聲震野矣仰籲蒼穹邈焉弗聞禱爾于
上下神祇渺不可測率前人有捐疆土又岌岌乎不可
保也而法家拂士方且日以危急痛切之辭交進乎吾
前則愈為之震惕震惕未已消沮繼之當是之時此心
之清明靜止者亂矣於是乎柔媚之人乘其幾而入之
曰是適然爾且將安堵也否則曰天數有定非人力可

與也又否則曰責在臣下不必過憂也夫以前日法家拂士之言如彼而今也柔媚之言乃如此於是乎疑慮頓釋憂懷遽紓邊塵若不見喪師若不知哭聲若不聞嗚呼外境固迷也内心之炳炳者其可欺哉惟其不可欺烏知不齰然悔悟躍然奮發耶孔子曰操則存舍則亡出入無時莫知其鄉惟心之謂歟噫是正操舍存亡之機也此念一回宜深懲既往之咎親鯁直而斥柔佞可也未幾而處逆境為甚艱反思順境之可喜而又適會夫敵騎暫退羽書暫稀果以為天助神

佑也雖明知秋高馬肥指期非遠而敵去則舞偷安目前
又將曰今者不樂日月其除矣於是震惕轉而為喜幸消
沮易而為縱肆何翻覆之甚耶夫始之震惕消沮今之喜
幸縱肆不過隨勢急緩而為之變遷皆非本心之正也陛
下何不奮乾剛之勇充離照之明自覺悟於心曰嗜欲
之娛何能解憂宴安之懷何足為樂徒使我獲戾于天于
神于宗廟而不得一日暫安今將清其天君盡更前轍則
必屏嗜欲懲宴安而吾身始立於無過之地則必察民

瘼決壅蔽而天下無異乎戶庭之間然後命股肱大臣
曰國勢蹙矣危機迫矣凡可以拯救生靈迓續天命者
汝其開誠布公汲汲圖之又命諫臣曰朕躬有過汝其
盡規臣有佞邪汝其極言此何如時而尚可有所諱避
乎又命將帥邊臣曰凡兵之失利者汝其察勇傷勞呻
吟慰安其父母妻子不幸而歿于陳者告于上而厚矜
恤之其忠烈之章章者朝廷亟官其子若孫而旌異之
大信昭布決不失言如此則天地宗廟必能察陛下之

心豈不陰相嘿佑轉災為祥乎四方忠臣義士必能信
陛下之心豈不感激奮厲捐軀報國乎理亂安危之機
特在陛下方寸間耳臣不敢毛舉庶事而獨論心源者
蓋以陛下之心清靜止則必知疾痛痒疴必通關節
脉悼邊毗之塗炭憤國步之多艱自能惡旨酒如大禹
自能不邇聲色如成湯自能衣大布冠大帛如興衛之
文公自能坐卧仰瞻飲食嘗膽如報吳之勾踐轉危為
安易亡為存有不難者不然中外之事可為痛哭流涕

者豈易枚數哉詩云我瞻四方蹙蹙靡所騁陛下之憂
臣之憂也陛下之辱臣之辱也主憂臣辱主辱臣死臣
固不惜一死而惜不以一疏悟陛下乎臣學淺識闇所
言樸直然區區忠赤粗得吐露陛下儻恕其狂斐而加
采擇焉豈惟微臣之幸實宗社生靈之幸

甫為兵部侍郎又上內引劄子曰臣迂疎樸野投迹山
林自知無補於當世陛下游加趣召臣前後控免屢矣
而陛下迄不俞所請者豈以微忠粗有可采耶今茲勉

策羸軀復覲清光亦願一吐真忱圖報陛下萬分一耳
臣聞激烈而言天下事固臣子愛君之忠涕泣而言天
下事尤臣子忠愛之切何則居安而思危處存而懼亡
慨然為激烈之論以聳動人主之聽是固可以言忠矣
乃若危中求安亡中圖存當事勢蹙迫之際而祈哀請
命於君父惟有涕泣而道之耳又何止激烈言之而已
哉厥今江潮暴涌蕩陵我都邑旱魃遺虐剝絕我民命
內則楮幣蝕其心腹外則強韃剥其四肢危亡之禍近

在旦夕陛下何為不一省悟乎夫憂慮切而後戒懼深
警言策至而後悔艾力臣敢涕泣以二語為陛下獻一曰
秉一德二曰塞邪徑而究其所以行此二語者則在陛
下真知省悟而已何謂秉一德臣聞終始不變之謂一
表裏無二之謂一當所朝臨蒞之時雖儼乎其齊莊及
內庭邃密之地或弛然而縱肆則不可以言一德矣陛
下靜觀默察內隱諸心吾之德一乎否乎聽治朝而百
辟聳瞻御經幄而儒生欵接當此之時求一言之誤一

動之愆無有也及退而自便其私敬心一懈純德或虧
陛下曷為至於此哉蓋所以潛移陛下之心者多矣何
則燕處之際娛悅耳目者聲色爾奔走後先者便嬖爾
是皆順我者也皆求媚乎我者也四方有敗彼則掩覆
天顏未憚彼則寬譬誘於易入動於可喜湛溺其中迷
不自覺視治朝經幄貞然不侔矣陛下博覽古昔洞見
成敗戒謹恐懼者國未有不治荒淫逸豫者國未有不
亂獨柰何不審所決擇而反至於與亂同事乎陛下豈

以禁嚴之地設有過言過行人莫予知耶潛雖伏矣亦
孔之昭鼓鐘于宮聲聞于外是烏可欺哉陛下縱自欺
奈蒼蒼在上林林在下者何臣所以涕泣妄言陛下未
能消天變孚民聽服遠夷者皆秉德不一之所致也何
謂塞邪徑臣聞以義交者為正路以利合者為邪徑正
路迂而易壅邪徑捷而易趨為人主者躬帥以正誰敢
不正其有稍趨於邪者痛懲而力遏之天下悚然知邪
徑之不可由其背邪向正也決矣今陛下不謹幾微邪

正雜操旁蹊曲徑其隙漸開宮掖之祕近習之乘稍有一隙則寡廉鮮耻者羣起而赴之紛多門不可悉數大凡公則必正私則必邪當今之時自上及下由中及外習以成風牢不可解一言以蔽之曰私而已請託以私而行賄賂以私而成黨與以私而固恩怨以私而報官爵以私而攫權勢以私而傾私意之萌陛下既有以啟之私意之極陛下又從而養成之臣來自草野側聞邇日邪徑之開難以枚舉其甚不忍聞者且至於累陛下

下之聖德矣夫私意勝則利心動利心熾則邪徑多邪
多而正少則導諛迎合者日至而忠言讜論落落乎難
合矣其極也不止於難合將反為邪所勝而正論愈榛
蕪矣其何以為國乎將見寔微寔滅蒼蒼者愈怒林林
者愈怨而陛下孤立於上其為憂懼又不止如今日矣
臣所以涕泣妄言陛下未能消天變孚民聽服遠夷者
又皆邪徑未塞之所以致也夫此一說其實一原果能秉
一德則邪徑有可窒之漸苟不窒邪徑則反至於累吾

之一德故曰惟在陛下真知省悟而已臣曩侍經帷屢陳懇款嘗進心本不動之說而陛下欣然嘉納且有學者之褒今復以省悟之說啟陛下陛下試思省悟者誰歟不知省悟者又誰歟豁然明白了無凝滯此正陛下之本心也即此本心坐照是非的然知夫宴安之必爲鴉毒羨羨之不如藥石凡以甘言蠱我以逸樂投我者彼皆自爲富貴地耳一中其計於彼則利於我何益及夫危亡之迫乎其後自詒伊戚誰復分憂陛下省悟及

此則知一德果不可以不秉邪徑果不可以不塞也昭
昭美雖然今當拯溺拔焚之時他無良策而獨持省悟
之說毋乃迂乎曰人之未省悟也猶醉之未醒夢之未
覺雖有良策亦安所施一省悟則醒矣覺矣良策乃可
得而施矣然則目前之事姑聽其自敗自壞必待省悟
而後救之乎曰隨事而救之不過一事而止耳今日衆
弊膠轄禍亂方興何可以一事盡借使一害僅去一害
又生源源方來夫豈智力之所能勝故莫若大正其本

盡悟前非而今而後奮乾剛之勇毅然不屈於物欲開
衆正之門確乎不牽於私意勿置其身於安平逸樂之
地而常納其身於憂危恐懼之中念祖宗凜凜在天之
靈則為之長慮而却顧懼國家岌岌不可保之業則為
之痛心而疾首覩萬姓將有淪胥阽亡之憂則為之食
不下咽寢不安席罪已有真切之意格天非虛偽之為
薄海內外皆知陛下昭然此心對越上帝然後大勢可
回大業可固非獨可以處暇也雖急而無以異乎暇之

整非獨可以履常也雖變而無以異乎常之安此豈非
一日省悟之機乎不然天下之事殆未可知而臣之涕
泣恐未有已也披瀝忠肝不敢累牘惟陛下留神

甫又進故事曰漢元帝永光五年太子少傅匡衡上疏
曰臣聞治亂安危之機在乎審所用心傳曰審好惡理
情性而王道畢矣治性之道必審已之所以餘而強其
所不足蓋聰明疏通者戒於太察寡聞少見者戒於壅
蔽勇猛剛强者戒於太暴仁愛溫良者戒於無斷湛靜

安舒者戒於後時廣心浩大者戒於遺忘必審已之所當戒而齊之以義然後中和之化應而巧偽之徒不敢比周而望進惟陛下戒所以崇聖德

臣觀匡衡所陳其戒雖有六而切於漢元帝之身者二條而已一曰無斷二曰後時蓋元帝之天資仁愛溫良者也湛靜安舒者也仁愛溫良者乏剛明果斷之操湛靜安舒者無奮迅振作之風遂使賢否混淆邪正雜糅漢業之衰端由於此衡不能挈此二戒懇

切言之使元帝豁然感悟改過遷善而乃混於六條
之中以聽人主自擇衡亦不善於格君矣當是時貢
禹之徒不力救優柔之失而徒以甘言游辭求合主
意此固不忠之甚者劉向上疏慷慨激切其言曰執
孤疑之心者來讒賊之口持不斷之意者開羣枉之
門可謂深中膏肓之病矣然亦有遺憾焉孟軻曰人
不足與適也政不足與間也惟大人為能格君心之
非君仁莫不仁君義莫不義一正君而國定矣當元

帝時筦中書典樞機者其人其政大略可覩然奚必屑屑然較勝負於此哉君心之本原未正而欲挽回於末流固宜憂乎其甚難也獨匡衡能從其用心治性而箴之然所言駁而未純泛而不力嗚呼漢儒病在不學耳使果有孟軻之學何患不能正君而國定哉匡衡劉向號為名儒卒不能究格心之業使天下謂儒無益於人之國儒果無益於國耶讀史至此為之掩卷三嘆

嘉熙二年校書郎徐元杰上奏曰臣嘗讀易於否泰剥復而知天下之理無有終窮剥極則必復否極則必泰一陽兆於復此生生之基也進則可以為三陽之泰矣人主為天地立心觀否剥已極之象將以新世道復泰之生意在乎反諸一心體復之義而已故有一身之生意則一身泰有國家之生意則國家泰有天下之生意則天下泰反是則剥與否而已茲非爻通為泰之難不遠而復之難也人主患不知復爾知復則隨寓隨覺有

自新之功不知復則隨覺隨泯有自暴之累秦穆殮陵之歸受責如流此過而能復者也漢武末年之詔深咎既往此迷而能復者也梁陳隋唐之君覩變異而不悟縱佚遊而不悔終於迷復敗亡而已然則處否剥之世有能自反而復則君德生生日新之美即天地生生日新之功致泰之道其在是乎恭惟皇帝陛下以仁聖之姿撫艱難之運自其緝熙聖學玩易知幾謂宜致天地之泰無難矣然端平新政初心清明不遠而復生意將

新此一機也失之名更化而實未嘗更化嘉熙以來容
養善念端復無悔生意又新此一機也失之於始玩變
而終未能消變激而為標韁之禍泄而為非時之雷溢
而為水旱日星之咎民物以是而消圮上下以是而扞
格天地剥否之象至此極矣然天下無終極之理君德
不可無自反之忱苞桑之戒不嚴不足以致休否之吉
貫魚之寵不察不足以遠剥近之災陛下悔悟之機屢
動而屢窒得非自反之未至復德之生意猶有未新者

乎壬午之風陛下之法家拂士也夫以恐懼修省方嚴
於避殿求言之時而火星失度且有戰氣是天心仁愛
之意其有加無已又如此則陛下夙夜畏威以祈天永
命者當何時而可已哉天亦念斯世否剥之極開一綫
之生意者在陛下然則轉一世之剥為一陽之復新一
陽之復為三陽之泰其機在聖心而已今也人臣愛君
請御正殿至再至三陛下勉而從之此正朝廷清明之
機開世道以復泰之日也非徒曰復新御朝之禮而已

陛下勿憂世道之泰為難當憂天理之復為難進潛陽
之剛則陽明勝而德性用者不可不充也消外陰之柔
則陰濁勝而物慾行者不可不窒也以孔門之克己復
禮者求之凡便安順適意欲好樂皆已也必剛以克之
而後欲盡而禮復矣以視聽言動之勿非禮者求之則
凡隱微之差形似之妄皆非也必明以辯之而後非禁
而禮復矣由乎中而應乎外制於外所以養其中陛下
以臨朝之清明玩不遠而復之義持之以克己之勇自

身而家自家而國自國而天下無往而不求為生意之充則世道復泰舉無難矣何以言之惡旨好善此一身之生意也臣竊觀陛下臨朝之詔有曰惟知菲食何暇嗜音臣子聳聞莫不以謂自斯言充之清明在躬志氣如神何往而不為修身之泰然賓筵惟戒媒近侍僕罔匪正人得無有所當檢柅益為聖德之謹者乎防微杜漸此一家之生意也臣嘗側聞陛下臨朝之旦嘗曰戚里予郡易啟私恩中外驩傳莫不謂自斯心充之糾禁

內謹政無多門何往而不為齊家之泰然蠹冗每難盡
窒狐社率多虛附得無有所當警飭益為命令之嚴者
乎黜陟有序此一國之生意也陛下臨朝而率作凡差
除進擬職所當遷亦莫不曲致其謹小大聳聞以謂自
此意充之上盡道揆下盡法守何往而不為治國之泰
然用賢轉石去佞拔山歲切上身詆及宮禁或有恚憤
於導人使諫之後是豈容不以正論元氣公道命脉益
為之扶植者乎備禦有經天下之生意也陛下臨朝而

憂顧以淮右封部盡隸督閫將以一其事任中外驩傳
以謂自此見充之舉措得宜而人心服城守相接而敵
騎擒又將何往而不為天下之泰然淮寇方掠憂重石
城西蜀未平難置度外況乎東西猶有治水鄰壑之疑
是豈容不以同舟遇風叶力共濟者益為之戒諭者乎
夫以陛下復德美意一旦發動其機如此則陽明之生
駿駿不已轉斯世否剥而復泰之此陛下所能為而不
容不勉而為之者昔董仲舒論災異警懼以為自非大無

道之世天盡欲扶持而安全之必繼之曰在勉強而已
勉強行道則德日起而大有功此陛下所當深體進夫
克己復德之誠求以無愧乎上天仁愛之本心則天下
國家之泰未有不自勉強充之是又愚臣之所惓惓也
雖然陛下反復為本固所以致泰也臣嘗觀剥復否泰
之機其所以然者君子小人實為之陛下燕閒玩易之
頃亦嘗於君子小人消長之際而深長思乎曰泰曰否
上下之志交與不交同與不同而已善處否者有傾否

之喜不善處泰者有復隍之憂其機至可畏也處剥之勢君子得輿尚為小人之剥廬而況於剥床以膚魚肉生靈者哉至於處復之時聖人不言君子而言朋來無咎正以世道一綫之生意在此故潛來君子之朋僅曰無咎而已蓋有意君子之道長也然則人主因天理之復開世道之泰又非九二大臣叶贊不能也故自天子至于大臣壹是皆以克己復禮為本今陛下克己無我尊禮大臣蓋亦閔世否剥求以為復泰之圖大臣色荒

慮遠固無一日不為天下計抑馮河有勇朋亡得中相
與叶贊陛下基泰之道者尤不容不重用其心也昔諸
葛亮曰宮府當為一體陟罰不宜異同親賢臣遠小人
此先漢所以興隆也繼今陛下惟日與二三大臣致謹
其所以興隆之本自一差擢之謹等而上之凡一命令
凡一黜陟無往而不以公天下為心於陽明必極其充
於陰欲必嚴其窒則天地生生之意當亦無往而不普
而況右揆久虛論相者陛下之職也曩者更化之初輕

用此職開邊之禍猶未歇也今不可以復輕矣世道存亡之決在此一舉臣願陛下宵衣旰食默祈於上天之公非耆艾骨鯁足以負荷斯世者不以輕畀而又博參中外之情以決之一皆出於天命有德而無私如是則天佑賢佐叶濟中興開之以明來無咎進之於茅茹彙征基世道以復泰之運或者猶可及也常人之見見於已形識者之見見於未形自其見於已形言之上而天變之未弭下而邊患之未平凡世道否剥之可為痛哭

又有如賈誼所謂難徧以疏舉者臣積忱竭慮思以轉
移機括感悟聖心惟自其未形者而圖之故願陛下靜
觀否泰剥復之幾益謹諸聖心而求所以為輔相裁成
之道庶乎可以感悅人心迓續天命上以重一祖十二
宗之付託下以繫四海億兆生靈之愛戴則天地復泰
之象不在天地而在陛下方寸中矣臣狂瞽末學初對
清光猥亵縷陳冒犯天聽罪當萬死惟陛下裁赦之
元杰又奏曰臣惓惓孤忠既以天理之復為世道之泰

投忱君父矣臣又私切有感焉夫邊患莫慘於今日故天變莫稠於今日陛下克謹天戒有感必通宜矣邇者太白經天流星墮晝質之占象皆非細故此必猶有應天以寶而未盡舉行者也昔伊尹耻其君不及堯舜孟子非堯舜之道不敢陳於王前臣戴陛下天地罔極之恩方待對也蚤夜齋栗如對上帝曷敢隱情惜已退有後言故茲瀝忱略述帝道冀以感悟萬分之一惟陛下力行好事無往不盡而後可以回天心之悔禍昔舜伐

苗之師以禹誓衆無不一乃心力三旬之逆猶不免焉
蓋書者記事之史也當時所載如此則苗之為害可知
益之贊禹乃曰惟德動天無遠弗屆繼之以謙益滿損
時乃天道之言至又推本於帝初歷山之號泣是天瞽
亦允若益豈為是緩而不切之言哉其意若曰格有苗
易格旻天難格旻天易格傲象難象至不仁親愛無已
是於其所難格者格之矣當時誕敷文德之實皆自其
天理中發之此所以至誠感神天為之動苗亦以格也

陛下聰明睿哲稽古如舜舉天下仰之如父母今也覩天變之狎至悵邊好之未通固欲以反求其躬行內修其政事此蓋有所不容緩者然臣謂舉繁縟不足以格天變之弭惟盡人事則不期而自弭殫計力不足以結邊好之和惟回天意則有感而自和故言善則星舍有潛回之機家和則狄輩亦豈得而至為今之計莫若充姚虞親愛之心密加於己復爵之邸崇周家內睦之仁深寓乎無不盡之情酌典禮於遷瘞憫嫠之時施德澤

於昭天漏泉之域使存者有所慰薦往者有所憑依是
亦盡人事之一端或者回天意之有所待也曩時儒生
忠愛似失之激不惟不足以迎陛下無窮之意反有以
惑陛下親愛既往之心然而陛下高明配天何所不察
博厚配地何所不容以御朝清明之初此正復見天地
之心之日也新陽生意幽壤如春冥昧昭蘇氤氳蟠塞
天開泰道助者順矣一順舉百順備何憂乎天變何畏
於韁首陛下其深繹之臣蠻蠂微蹤生平無他妄念惟

知盡臣子之職為難今叨恩非據得對天日少殫畎畝
之忠而後屏處窮閭臣之志願塞矣惟陛下矜察
景定四年禮部侍郎牟子才上奏曰臣違遠閩庭凡閱
九載中蒙全度獲保山林不自意聖明照知終賜收召
遂得復望穆清之光自惟蒙恩至深所當竭忠以報而
臣衰病廢學莫效萬分此臣之所愧懼也臣嘗觀先儒
朱熹之於孝宗蓋自癸未入對首以本然之天理為言
辛丑再入又申言之至於戊申之對越八年矣而尤拳

拳焉望以天理之純而人欲之盡夫以孝宗聖明二十
七年之間熹之效忠者終始不越乎天理之說然後知
臣子之愛君惟於閱歷之人而驗其本然之天理而已
恭惟陛下聖性高明聖學繢熙其所用力於天理者久
矣臣曩侍經幄親承睿訓固知陛下可以為堯舜可以
為湯武而一時諸臣之誤陛下者乃日夜與陛下之理
為仇聖心本寅畏也而彼則有逸豫之說聖德本忠厚
也而彼則有刻薄之說聖度本優容也而彼則有譁競

之說臣固知陛下本心必不出此而皆諸臣之誤陛下也及一覺悟以之戇難更化定大本不勞餘力皆陛下本心之天理實爲之臣益有以驗陛下四十餘年講明之素持循之力懲艾感發之真而諸臣之說終不足以誤陛下也臣忱不妄以爲陛下之天理盖至是而始定矣天理人欲介乎毫芒體認難真操持易失而所謂人欲者非必聲色貨利也苟微有所係吝微有所壅滯皆足以爲本心之累而三者之說每得以乘之此臣熹之

所以告孝宗者猶恐其天理之未純人欲之未盡而公私是非邪正咸得以交戰于中也臣切觀陛下自再造以來經理創殘鎮定危疑內而振贍畿輔之水潦外而應酬疆場之事會君臣相與焦勞圖惟者久之而後定其勤蓋如此切度聖心固不忍以目前之庶定遽忘前時之克艱而臣愚過計則以為宿憂既弛順境易移不知天將去其疾而俾遂無後憂邪抑順適吾意而或為宴安之鴉毒也故臣願陛下有以全敬畏之本心陛下

即位以來恪守家法以禮待士大夫以仁愛百姓不幸
小人誤國始用一切以戕其脉夫以法毒天下未有不
反中其身者也今既盡反其所為矣譬如人之一身寒
邪既去元氣尚虛非養之以梁肉調之以參术不可也
謂宜悉取祖宗所以待士愛民祈天永命者循而行之
而後可以輯四海安靜和平之福而延洪億萬世子孫
無疆之休故臣又願陛下有以全忠厚之本心維我祖
宗治尚寬厚而公議一脉極力扶持所以振起其頽墮

不舉之處而使之無壅底不通之患往者言議之臣指
喻時有過當聖度猶見涵容中更積威之餘風采消沮
雖或求言之意形於詔旨而人懲曩禍孰肯盡言言及
乘輿尚見優假事關廊廟忿怒斯形臣恐日往月來遂
成風俗非所以養敢言之氣而為國家之福臣益願陛
下有以全優容之本心凡是三者皆陛下本然之天理
所以旋乾轉坤傾否致泰盖陛下之所嘗實用其力而
終賴其力者也故臣納約自牖輒援是以忠益之義而

不暇泛及於事物之末惟陛下每以臣言為迂而幸聽之不勝幸甚

理宗嘗視朝謂將作監王應麟曰為學要灼見古人之心應麟對曰嚴恭寅畏不敢怠皇克勤克儉無自縱逸強以馭下制事以斷此古人之心然操舍易忽於眇緜兢業每忘於遊衍帝嘉納之

理宗時秘書郎許應龍上奏曰臣聞國於天地必有與立一曰君德二曰人心夫天下至大也王業至重也所

賴以憑藉而扶持者固亦多術矣而臣獨以君德人心
為先者蓋君德厚薄乃安危之兆人心向背實理亂之
基君德苟正則朝廷清明治功振起於寬厚宏博之中
而隱然有不可犯之勢人心苟固則尊君親上如手足
之捍頭目雖當危疑緩急之秋亦無解散動搖之患故
古先聖人不慮國勢之不強惟慮己德之不脩不慮外
侮之難禦惟慮人心之未附蓋敵國外患何世無之雖
虞朝之盛猶有弗率之苗民周治之隆猶有不服之崇

國然舜文之心曷嘗以是爲患哉文德之敷民心之洽既足以致風動之休則蠹茲有苗何慮其不格徽猷之德懷保之恩足以格子來之衆則崇墉言亦因壘而自降矣漢唐之君雖非帝王比然七制能以公恕統天下而四百年之間舉無二志唐以仁厚結人心雖屢更變故皆不旋踵而定是知君德人心乃國家之元氣而長治久安未有不本諸此請復以國朝之事明之共惟藝祖立極聖聖相承講學行仁求賢納諫下情通而無

壅蔽之患公論伸而絕好惡之偏其正君德有如此者
戒藩侯以撫養厭將臣之殺降緩故縱之誅重誤入之
辟鷗河北之鹽寬陝西之稅其結民心有如此者是以
朝廷尊安基業鞏固雖澶淵西夏之警智高鬼竇之黠
皆隨起隨仆卒晏然而無患是果何以得此哉以兵而
言則無大兵威以操制生人之命以刑而言則無深責
重罰以禁遏姦宄之心疑若委靡而不振矣而二百餘
年之間主威國勢隱如雷霆固若磐石亦惟君德明於

上人心固於下足以消姦邪之萌而杜禍亂之原也陞
下纂承丕緒尊奉慈極親近儒生開廣言路聽斷訪問
未嘗少懈出入起居罔有不欽皆所以正君德也大風
之變首議蠲免洪水之災倍加賑卹旌廉抑貪欲宣德
意赦過宥罪務行寬大皆所以結人心也是宜天地和
應雨暘時若年穀順成民生豐裕將以建大政而興太
平而疆場之防猶闔宸慮然大明當天驅魅自伏今聖
德昭明賢才萃聚豈無運籌帷幄以決千里之勝者乎

人心愛戴中外和協豈無賢於長城者為吾之捍禦乎
昔裴度言於憲宗之朝謂淮西盜定河北底寧豈朝廷
之力能制其命直以區處得宜能服其心耳今日之事
苟區處得宜隨機而應變強本而弱支則進退伸縮無
不如意尚何外患之足慮哉雖然君德人心固所以為
固國之本而君德之脩又所以為固人心之本然人心
不難固而君德為易虧苟德脩於上有加而無已則民
戴於下無時而或釋臣願陛下法乾之健體恒之久不

以躬行為已至而或怠於力行不以日新為已盛而益期於又新則澤流而益深仁增而益高民之戴德永無窮將使外薄四海無思不服國勢尊安猶太山而四維之矣臣不勝拳拳

應龍又進故事曰仁宗朝丁度等答邇英聖問一卷其序曰自古求治之主靡不欲興理道安邦國納忠正退姦邪廣聰明致功業然行此數事在明與剛斷爾明則不惑剛則有執斷則能行總是三者守而勿失非聖人

孰能為之司馬光言人君大德有三曰仁曰明曰武武者非強亢暴戾之謂也惟道所在斷之不疑姦不能惑佞不能移此人君之武也

臣聞赳赳雄斷光武所以再造剛明果斷憲示所以中興蓋天下無不可為之事特患夫人主無獨斷之明所見苟明是則行之非則違之而不為羣議所惑用賢則勿貳去邪則勿疑有功則必賞有罪則必罰振厲奮發凜然有不可犯之勢則令行而禁止利興

而害除顧何事之不可為哉柰何時君世主明不足以有臨剛不足以有執非不用人而人之賢否莫能別非不立事而事之是非不能辯故讒說者得以容其欺巧言者得以逞其辯悠悠歲月竟無成績天下之治將日趨於委靡而不復振矣吁此丁度所以有自古致治之主在明與斷之論而司馬光亦曰斷之不疑則姦不能惑佞不能移者正謂此爾今日總攬權綱作新政治切於用賢則旁搜而博采急於求言

則廣覽而兼聽然守邊備塞豈無一定之畫而和戰之議角立建功立業當有敢為之勇而遲疑之意未決是以望治雖勤而成效愈邈夫執狐疑之心者來讒賊之口持不斷之意者開羣枉之門故劉向獻言於漢而欲其決斷狐疑分別猶豫使是非炳然而後可以興太平之基者真至當之論也夫所謂斷者非強明自任之謂也參之以衆論之公酌之以當然之理是非未明則反覆詰問必求其實若果合宜則守

之以堅行之以果不以異議而搖不以小未如意而沮則事無不舉功無不成而中興可冀矣

洪舜俞進故事曰其席前左端之銘曰安樂必敬前右端之銘曰無行可悔後左端之銘曰一反一側亦不可以忘後右端之銘曰所監不遠視邇所代 機之銘曰皇皇惟敬口生呴口戕口 鑑之銘曰見爾前慮爾後盥盤之銘曰與其溺於人也寧溺於淵溺於淵猶可游也溺於人不可救也 檻之銘曰毋曰胡殘其禍將

然母曰胡害其禍將大母曰胡傷其禍將長杖之銘
曰惡乎危於忿癉惡乎失道於嗜慾惡乎相忘於富貴
帶之銘曰火滅修容慎戒必恭恭則壽屢履之銘
曰慎之勞勞則富觴豆之銘曰食自杖食自杖戒之
憇憇則逃戶之銘曰夫名難得而易失無慙弗志而
曰我知之乎無慙弗及而曰我杖之乎擾阻以泥之若
風將至必先搖搖雖有聖人不能為謀也牖之銘曰
隨天時地之財敬祀皇天敬以先時劔之銘曰帶之

以為服動必行德行德則興背德則崩 弓之銘曰屈伸之義廢興之行無忘自過 矛之銘曰造矛造矛少間弗忍終身之羞予一人所聞以戒後世子孫 衣之銘曰桑蠶苦女工難得新捐故後必寒 鏡之銘曰以鏡自照見形容以人自照見吉凶 翳之銘曰樂極則悲沈湎致非社稷為危機之銘曰安無忘危存無忘亡孰惟二者必後無凶 杖之銘曰輔人無苟扶人無咎

此武王聞丹書於師尚父爲銘以自警也維昔帝王之治天下莫不以敬爲主敬則百慮澄不敬則百慮擾敬則萬善集不敬則萬善隕是敬非自外而入也上帝臨汝毋貳爾心知所畏然後知所敬也人身都綦貴心受衆攻非隨物致戒以警勅之則畏心忘而敬心泯天理之存者幾何武王惕懼而銘諸物不曰視邇所代則曰溺不可救不曰其禍將大則曰社稷爲危何其辭之嚴也天真難保人慾易流出入起居

之際龜鑑在目庶幾常若危亡禍亂之厭其前而起
臨深履薄之懼無一念之非敬也然以武王之聖豈
待睹銘而知懼哉堯舜性之也湯武身之也身之則
寧過於檢防求進乎性之之城也其或收斂於十手
十目之地而縱肆於暗室屋漏之中修飾於親儒生
學士之時而玩狎於對宦官女子之頃雖有此銘如
無此銘矣故中庸大學皆貴乎君子謹其獨

度宗即位起居郎兼侍講湯漢入奏言願陛下持一敬

心以正百度則追養繼孝所以報先帝者必益致其隆
先意承志所以事太母者必益致其謹其愛身也必不
以物欲撓其和平其正家也必不以私昵隳其法度政
事必出於朝廷而預防於多門人才必由於明揚而深
杜於邪徑

度宗時牟濬進故事曰臣聞孔子曰為君難為臣不易
如知為君之難也不幾乎一言而興邦乎臣竊以君道
之大無所不難苟得其要而持之則所難者少矣臣請

略舉其要陛下試垂聽幸甚言無所隱之謂忠心無所
欺之謂信忠於主者不避嫌信其已者不思謗所以忠
信或至於獲罪故人君以察忠信而主之為難巧於言
之謂佞順於事之謂柔巧言則易得順事則易從所以
佞柔常至於日親故人君以辯佞柔而遠之為難廣大
業者存乎勤而人情常易於生倦以隙其業故人君以
久而不倦為難成大謀者存乎斷而人情常牽於小不
忍以亂其謀故人君以棄小不忍為難臣以謂為國之

要能察忠信而主之使得盡言辯佞柔而遠之使不害
政行之以勤而無廢弛之憂濟之以斷而無優游之患
則治道成矣

臣日侍經筵荐蒙聖問以為君難之義臣嘗敷陳其
槩退而仰歎聖學高明深惟克艱厥后之旨而不以
易心臨天下堯舜之用心也臣每思所以推廣聖意
者今觀王巖叟所論為君難四事言言懇切真有益
於君德臣敢摭其說為陛下告蓋正人之事君也主

於忠忠則不欺不欺則至公至公則言有所拂事有所違人君主之不力則往往始親而終疎之而忠信或至於受禍漢元帝之於蕭望之是也佞人之事君也主於不忠不忠則敗罔欺罔則為私為私則言皆諛悅事皆柔從人君察之不至則往往始遠而終比之而佞柔終於得志唐德宗之於盧杞是也廣大業者存乎勤不能兢業一心則或至倦惰唐玄宗開元天寶之治是也成大謀者存乎斷不能以義制事

則或失之優游漢元帝不能振孝宣之業是也為君
之難雖不止是四者而四者乃其綱領也臣嘗推本
而論之惟見善明用心剛則主忠信必立遠佞柔必
果無始勤終怠之憂無優游不斷之慮矣昔太祖皇
帝一日坐便殿俛首不語者久之左右請其故帝曰
爾謂帝王可容易行事乎朕早來乘快指揮一事史
官必書於簡冊故不樂也此深得為君難之義臣願
陛下以太祖之心為心而取嚴叟所陳四事深加之

意則治天下可運諸掌奚其難惟陛下幸聽

遼興宗問翰林都林牙兼脩國史蕭罕嘉努曰我國家創業以來孰為賢主罕嘉努以穆宗對帝恮之曰穆宗嗜酒喜怒不常視人猶草芥卿何謂賢罕嘉努對曰穆宗雖暴虐省徭輕賦入樂其生終穆之世無罪被戮未有過今日秋山傷死者臣故以穆宗為賢帝默然

金太祖與高麗議和凡女真入高麗者皆索之至十餘年索之不已太宗時皇子勗上書諫曰臣聞德莫大於

樂天仁莫先於惠下所索戶口皆前世姦宄叛亡烏春
烏木罕阿海阿克順之緒裔先世綏懷四境尚未賓服
自先君與高麗通聞我將大因謂本自同出稍稍欵附
高麗既不聽許遂生邊釁因致交兵久方連和蓋三十
年當時壯者今皆物故子孫安於土俗婚姻膠固徵索
不已彼固不敢稽留骨肉乖離誠非衆願人情怨甚可
愍者而必欲求為已有特彼我之蔽非一視同仁之大
也國家民物繁夥幅員萬里不知得此果何益耶今索

之不還我以強兵勁卒取之無難然兵凶器戰危事不得已而後用高麗稱蕃職貢不閼國且臣屬民亦非外聖人行義不責小過理之所在不俟終日臣愚以為宜施惠下之仁弘樂天之德聽免徵索則彼不謂已有如自我得之矣從之

哀宗時禮部尚書兼侍讀楊璽嘗患風痺至是稍愈上親問愈之之方對曰但治心耳心和則邪氣不干治國亦然人君先正其心則朝廷百官莫不一於正矣上

瞿然知其為醫諫也

元世祖中統二年春內難平李昶上表賀因進諷諫曰患難所以存敵戒禍亂將以開聖明伏願日新其德雖休勿休戰勝不矜功成不有和輯宗親撫綏將士增修庶政選用百官儉以足用寬以養民安不忘危治不忘亂恒以北征宵旰之勤永為南面逸豫之戒世祖稱善久之

世祖時趙天麟上策曰臣聞放之彌六合卷之退藏於

密者心之體也範圍天地而不過曲成萬物而不遺者
心之用也此兩者其實體用而已矣體以統用則神道
設教而天下咸服用以達體則行其無事而真源自淨
含之若虛啟之有餘內外周圓上下如一三皇大之而
道徹終古五帝性之而德垂後世三王身之而仁流萬
邦五霸假之而功加一時何以言之蓋四端如四時之相
用五常符五行之不忒混而為一謂之太極暢而示微謂
之無極非無極不足以知神人之圓靈非太極不足以見

聖人之大致太極即無極也聖人即神人也性無不善人無不同雖凡愚不能無道心道心惟微故聖人貫天下之道氣稟所拘物慾所移雖神聖不能無人心人心惟危故聖人崇天下之教道者名異而理同既非心而不圓教者下學而上達又非心而不立夫性者心之齊而真理也情者心之發而為事也仁者心之愛也義者心之宜也禮者心之節也智者心之覺也信者心之實也理以存妙事以應務愛以盡公宜以方外節以暢文

覺以燭暗寶以明誠此七者其實性情而已矣性定而情自檢者心也情定而性自復者亦心也凡在下者心定則非分之望消凡在上者心定則化育之方備欽惟陛下父天母地寰海為家四三皇而六五帝仰三王而俯五霸以非常之資御非常之尊以不世之德膺不世之運一言之出神鬼橫集一意之行風雷翕變夫動者靜之末也靜者動之本也審乎本末則心自定矣原乎動靜則心自正矣精乎道教則心自誠矣昭乎體用則

心自明矣定正以契天人之相通誠明以洞天人之無
二又豈在察察以用神孜孜以致感哉五常包絡於此
四時調和於彼運天下於掌上炳天下於胷中無為而
為不宰而宰斯皆陛下固有之當然已行之常事伏望
慎終如始疇不賴焉

天麟又上策曰臣聞運元氣之神以安五行而盡自然
之健者天也協五行之位以定元形而備無疆之順者
地也據五行中五方法健以為動效順以為靜者帝王

也帝王之德參天兩地貴于公而不私焉公者義也私者利也量義以動則憂以天下樂以天下而王道備矣放利而行則既失民望又失民心而王政怠矣是以聖人其臨民也懷乎若朽索之馭六馬其撫民也柔乎若慈母之視嬰兒所欲與之聚之所惡勿施爾也且下民皆國家之民也而民財皆國家之財也又何須泛取於下而輕用於上哉竊見郡縣之中賦斂之時鄉司里正定其貧富專加擅減營利于中富家之利優游有餘貧

家力不能及遂舉債于他家其或失期稽限罪莫可逃
齊之以號令威之以刑罰愁怨之氣寃苦之聲充塞天
淵伊誰救者又或不辨則官吏亦從而得罪矣及其會
計上司納于府庫凶年不發其積貧民不蒙其賜樂工
之流呈戲技而圖之荷寵之人迎喜氣以期之豈不傷
於用財之至公哉且怒者聖人之所不免也一怒之中
事存萬理故中庸以中節為和顏子以不遷為德竊見數
年以來北征閻牆之叛東伐浮海之國近又大舉南征

鞭策未嘗停戎韁未嘗解謠曰天子怒起伏伏尸萬里信乎其如是能不戒之哉臣竊以四遠未知禮樂之當然遷徙無常翬翔邊徼勝之不足喜得之不足治今乃煩天威而怒之而討之豈不傷於用力之至公哉伏望陛下下思地利之艱難上審天心之仁厚知民之欲富也則寡用其財而衆生之知民之欲逸也則常愛其力而務存之知喜之太過而損其陽則節之知怒之太過而盪其陰則息之知王者之貴於無私則敷大公以御之知

信之可示於天下則推赤心以治之財積而下富上足
心固而下定上安喜怒有宜而內外無可悔之機公信
既宣而上下無相疑之意如膠漆之固如壇籩之和君
聿致於無為民不知其帝力然而兆人之不富四遠之
不服未之有也

天麟又上策曰臣聞動植具於有物之先乾坤判於無
名之始流通二氣班布五行惟人也括萬象以獨靈執
一中而不倚芒乎若醇醪之酩酊寂乎猶混沌之鴻濛


及其清濁遂分視聽胥引智愚懸隔強弱難齊總總而生林林而羣太朴降焉良心放矣中人以下騁利慾之紛拏下愚之流梏癡迷而忘返以至剥牀交戰暴戾相凌或顧影以無依或籲天而無告爰生大聖弘濟風波肇啟三皇繼開十紀維持造化把握陰陽三才定而天地位尊卑立而萬物育由此觀之蓋天為民而立君也君道貴仁天道輔德年丁五百命我皇家祖帝軒蔓衍之遺芳掃金宋區分之偏境東浮洋水西越崑崙南蕃

于交廣之南北限於玄虛之北虞夏之玉帛萬國越可
相同漢唐之宇宙一家猶難並議功已成矣德已興矣
道已行矣政已平矣陛下能無思乎陛下能無戒乎思
夫業之所立者祖也方其雲興虎噬神鬼助功電激雷
奔龍蛇起陸欲啟處而不遑啟處欲自暇而不獲自暇
櫛風沐雨勞身於戈甲之秋冒棘披荆抗志於煙塵之
際以至于有天下茲惟艱哉今天下已定守之非易能
不思艱難乎戒夫業之所本者民也民之所恃者政也

民可近不可下非民無以立統非衆罔與守邦慮其啼
饑也薄取其斛粟念其號寒也減徵其織帛冀其知禮
也申之以孝弟欲其知禁也示之以好惡勞之來之匡
之直之輔之翼之又從而振德之且政雖一理日有萬
機一事尚未形見而即防之一言雖無大害而即慮之
堤潰於蟻孔氣泄於鍼芒骨銷於積毀軸折於叢薄可
不戒哉而又據古今成敗以為龜鑑參天人感應以察
休咎冕旒前蔽不矜其明而視於至公難續旁塞不眩

其聰而聽於大同委賢以任之量能而用之敬以居之
簡以行之勤而不煩逸而不過清而不激默而不窒披
袞服端拱以向陽執鎮圭宴坐而當寧寶位以之而克
安龜祚以之而克固傳諸子孫耀於罔極使史筆欣然
而贊之曰大元天子之德皇兮將兮莫之與京尚矣熾
矣莫之或擬不亦光哉不亦快哉愚臣亂言罪當萬死
伏望陛下檢身若不及為善惟不足稽伯禹之不自滿
假體成湯之聖敬日躋過聽愚臣之言曲免狂妄之罪

竊謂聖心同海涓流不棄而浸浸增深故能大寶齊天
億萬無疆而綿綿永鎮矣



歷代名臣奏議卷五